

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗簾，同正對甜甜夢肚醒來个僵攢手；難得个放棄日，搵在眠床看日頭輕輕仔徒步、聽窗門外背鳥仔聲唧啾，時間乜像恬恬頓腳咧，啊！這靚靚个朝晨。

食過朝，想去遠久無見个朋友。自家駛車仔，時間就在自家个手頭項，做得慢慢仔行、定定仔奈；經過鬧熱个街市，車輪仔慢慢仔轉入鄉道，來到苗栗个穀倉——灣裡。路个兩片，金黃飽米个禾串仔硬硬會對禾田湧出來哩；風吹來，該一陣一陣歡喜到手攢腳踏¹、搖頭扭腰个金黃稻浪，實在還靚。田脣企等兩個在該比手畫腳个阿伯，日頭晟來，笠嬾下晒到烏刻刻仔个面項，單淨看著兩排雪白个牙齒，想來應該當滿意今年係好年冬啦！

幹過一個大彎幹，共樣係闊野野个禾田，直直透到山下；深深淺淺个黃襯等嫩青个田脣、浸青个大樹，就像係天公伯个調色盤，乜係這個豐收个季節正會有个景色。該向有幾坵仔既經收成忒早冬禾，準備愛過蔴二冬禾个禾田。田水清清清，同朗朗个藍

天、白雲、田脣个樹仔、人家屋，明明明个反映出來，就像係框在田脣做个相框裡肚个相片，實在有罅靚。這向堵好有一坵田還當在該割禾，紅色个割禾機在田肚緊行緊割，三、四儕人在脣項拂手，歡喜个做到無閒泊杈；割禾機後背跔歸陣个白鶴仔，有兜低頭絡食、有兜大步尋食、有兜飛高飛低搶食，鬧熱煎煎，這就係禾田肚盡有生命力个畫面咧啦！

車仔慢慢仔溜入莊頭，伏在路脣个老狗牯看著車仔來，伸懶筋企起來拂尾，就像係迎接老朋友樣仔。一個著花衫个老伯姆站在屋面前个菜園摘菜，菜園分屋仔蔭等、日頭還吉會晒著，青荷荷个菜葉面還承等露水，看來當萋、當錫人食樣仔。兩個國小年紀个細阿倌仔，一儕定定仔踏等自行車，一儕半行半走、手項拗等籃球，兩儕嘻嘻哈哈有講有笑愛共下去打球仔。這一路个光景，實在分人心情舒爽。

主人家款好一桌點心、番豆同瓜子，還有清香个高山烏龍茶，三、四個真久無見面个老朋友，天南地北講到毋知天合地。茶香、情醺，靚靚个日頭、靚靚个心情，這就係簡單个幸福。

¹ 手攢腳踏：音 su` ngiong` giog` tab；手、腳舞動跳躍。形容非常高興喜悅的樣子。

編號 2 號

【陂塘】許倩雯原作

用鏡頭記錄臺灣這片土地个導演齊柏林，坐在直升機頂對天頂看往下，佢講桃園个陂塘就像係「散落一地个水晶，金皙皙仔！」

兩隻白鶴仔一前一後在陂塘面飛過，白雪雪个身影印在平靜个水面。嫩黃个水蓮花²對青青个水肚探出水面，細細蕊仔个花就像係天頂一瞞一瞞个星仔，靚到耐毋得。

立秋正過啊忒，陂塘就飛來咧一群準備愛過冬个人客！鬥腳鳥³水紅色个長腳，躡在淺水所在定定仔行，鳥背在水肚掃來掃去掃毋會停，煞力拈在該尋食。花喇花喇⁴个細水鴨頭那汨入水肚，屎朶翹到半天高。忽然間，一粒扁扁个石頭飛啊過來，嚇到這群鳥仔被翼飛走。原來係陂塘脣，一陣細孖仔在該打水漂仔。坐在樹下擎等釣槓个男仔人，大聲罵：「人家在這釣魚仔，你兜孤盲頭在該變麼个齣事，莫來這搞！」

月華蹶上天頂，在水撈地个合界，白鶴花⁵个清香跔等夜風散開來。夜呱仔⁶醒吔，昏哆昏哆⁷个喊等：「嘎！嘎！嘎！」；像烏鈕仔恁大个甥甥仔拂等尾泗水，正對厥圓身生出來个四支腳，在陂塘脣尋等所在上岸。蛇哥發現正在水肚跳出來个烏影，黏時就對草竇趁啊出來，開始逐佢兜！

有人同桃園喊做「千塘之鄉」，這肚底像碗公樣仔，大大細細个陂塘，全部係人工挖出來个。先民在開墾个過程肚盡辛苦，高不將挖陂塘來頓水蔭田。陂塘盡多个時節，有萬過隻，也變成桃園盡特殊个地理景色。每一隻陂塘都有自家个故事，當多人第一擺个泗水、第一擺个釣魚仔，都係在陂塘發生个。

年視年，跔等時代个流轉，桃園都市化个程度緊來緊高。有兜陂塘失忒蔭水个功能，一隻一隻分人屯忒，起做機場、學校，無就公園。伸著个陂塘，經過規畫整理，有咧新生命个延續，變做現代人休閒遶寮个好所在！

¹ 金皙皙仔：音 gim' xiaŋ' xiaŋ' e'；金光閃閃。

² 水蓮花：音 sui' lien' fa'；臺灣萍蓬草。

³ 鬥腳鳥：音 deu giog' diau'；高蹺鴿。

⁴ 花喇花喇：音 fa' la' fa' la'；花色混雜。

⁵ 白鶴花：音 pag hog fa'；野薑花。

⁶ 夜呱仔：音 ia gua' e'；夜鷺。

⁷ 昏哆昏哆：音 fun' de' fun' de'；糊塗、精神意識不清楚的意思。

編號 3 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該載堵好係梅雨季節，落過雨、起風也，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩天弓，還鼻得著打馬膠路¹分日頭花煎過、分雨水打過以後淡淡、香香个味緒，臨暗頭窗門外背一陣一陣「揸、揸、揸！揸、揸、揸！」个蟬仔聲順等清風傳入屋肚來。

恁起還細時節，熱燠燠个下晝頭，恁恁多姊妹會摻隔壁鄰舍个細人伴仔共下搞，輒常搞到斷烏，聽著阿姆開聲喊：「好轉來洗手食飯咧！」正盼得轉屋。

吾爸係客運司機，平常時愛輪班，故所總係暗晡頭八、九點正下班。當記得係堵好該日無伸麼个飯菜，吾爸會自家煮麵食。逐擺佢就摻蒜頭礮礮啊、再剝到幼幼，泚一息仔豆油還過香油，先放在碗公肚，續等摻煮好个麵撈起來，水泌昇燥，再同麵倒到碗公，摻麵同蒜頭、配頭攪昇勻，該央時係聽著吾爸問：「有麼

人愛食麵無？」佢這兜就盡暢，遽遽飄入灶下，你一口、佢一口，又賺著一餐香噴噴个大麵點心，食到飽飽仔，還幸福哪！吾爸同伸个飯菜間等伸無幾多條个大麵，儘採划落肚，就恁樣過一餐。

又還記得，熱天臨暗頭洗好身腳，等到食飽夜，碗筷撿掣，寫好作業，看一下電視，細人仔還細又好搞，差毋多到愛上眠床該下，又一身汗也；毋過，頭擺屋下無恁好額，淨有一隻間房安有冷氣定定。阿姆會提早半點鐘摻冷氣掣開來，等大家愛睡目該下，間房門打啊開來，涼沁沁个冷氣，還有阿姆拿去晟過日頭个被骨，散出香香个日烈味緒，歸屋下人尖在兩頂眠床頂，黏時就睡落覺咧。

這幸福个滋味一直囤在吾心肝頭，毋多知仔成人長大、做人阿姆以後，正知「賺錢可比針挑筊，使錢可比水推沙。」正體會著爺哀頭擺辛苦畜大佢這兜恁多个細人仔、愛理一個家哪有恁該？毋過該愛盡个責任摻義務，佢兜從來都毋識放忒過。

¹ 打馬膠路：音 da`ma`gau`lu；柏油路。